

第二三六冊

明倫彙編

皇極典

登極部

(卷)
一五—一七

古今圖書集成

中華書局影印

古今圖書集成
卷一百一十五

目錄

古今圖書集成

中華書局影印

欽定古今圖書集成明倫彙編皇極典

第一百八十五卷目錄

登極部彙考十一

梁二帝承聖一則

簡文書大寶一則 元

皇極典第一百八十五卷

登極部彙考十一

梁二

武帝太清三年五月丙辰簡文帝以皇太子即皇帝位

按梁書簡文帝本紀太宗簡文皇帝諱綱字世繼小字六通高祖第三子昭明太子母弟也天監二年十月丁未生于顯揚殿五年封晉安王食邑八千戶八年爲雲麾將軍領石頭戍軍事量置佐吏九年遷使持節都督南北兗青徐冀五州諸軍事宣毅將軍南兗州刺史十二年入爲宣惠將軍丹陽尹十三年出爲使持節都督荆雍梁南北秦益寧七州諸軍事南蠻校尉荊州刺史將軍如故十四年徙爲都督江州諸軍事雲麾將軍江州刺史持節如故十七年徵爲西中郎將領石頭戍軍事尋復爲宣惠將軍丹陽尹加侍中普通元年出爲使持節都督益寧雍梁南北秦沙七州諸軍事益州刺史未拜改授雲麾將軍南兗州刺史四年徙爲使持節都督雍梁南北秦四州

鄧州之竟陵司州之隨郡諸軍事平西將軍寧蠻校尉雍州刺史五年進號安北將軍七年權進都督荆益南梁三州諸軍事是歲丁所生穆貴嬪喪上表陳解詔還攝本任中大通元年詔依先給鼓吹一部二年徵爲都督南揚徐二州諸軍事驃騎將軍揚州刺史三年四月乙巳昭明太子薨五月景申詔曰非至公無以主天下非博愛無以臨四海所以堯舜克讓惟德是與文王舍伯邑考而立武王格于上下光于四表今岱宗牢落天步艱難淳風猶鬱黎民未又自非克明克哲允武允文豈得荷神器之重嗣龍圖之尊晉安王綱文義生知孝敬自然威惠外宣德行內敏羣后歸美率土宅心可立爲皇太子七月乙亥臨軒策拜以修緒東宮權居東府四年九月移還東宮太清三年五月景辰高祖崩辛巳即皇帝位詔曰朕以不造風丁閔凶大行皇帝奄棄萬國攀慕號慟厝身靡所擬以寡德越居民上榮煢在疚罔知所託方賴藩輔社稷用安謹遵先旨顧命遺澤宜加億兆可大赦天下

簡文帝大寶三年十一月丙子元帝以湘東王即皇帝位于江陵

按梁書元帝本紀世祖孝元皇帝諱繹字世誠小字七符高祖第七子也天監七年八月丁巳生十三年封湘東郡王邑二千戶初爲寧遠將軍會稽太守入爲侍中宣威將軍丹陽尹普通七年出爲使持節都督荆湘鄧益寧南梁六州諸軍事西中郎將荊州刺史中大通四年進號平西將軍大同元年進號安西將軍三年進號鎮西將軍五年入爲安右將軍護軍

將軍領石頭戍軍事六年出爲使持節都督江州諸軍事鎮南將軍江州刺史太清元年徙爲使持節都督荆雍湘司鄧寧梁南北秦九州諸軍事鎮西將軍荊州刺史三年三月侯景寇沒京師四月太子舍人蕭歆至江陵宣密詔以世祖爲侍中假黃鉞大都督中外諸軍事司徒承制餘如故是月世祖徵兵于湘州湘州刺史河東王譽拒不遣十月景午遣世子方等帥衆討譽戰所敗死是月又遣鎮兵將軍鮑泉代討譽九月丁卯雍州刺史岳陽王譽舉兵反來寇江陵世祖嬰城拒守乙丑督將杜昶與其兄弟及楊混各率其衆來降景寅督遁走鮑泉攻湘州不克又遣左衛將軍王僧辯代將大寶元年世祖猶稱太清四年正月辛亥朔左衛將軍王僧辯獲橋三十子共帶以獻二月甲戌衡陽內史周弘直表言鳳皇見郡界夏五月辛未王僧辯克湘州斬河東王譽湘州平六月江夏王大款山陽王大成宜都王大封自信安間道來奔九月辛酉以前鄧州刺史南平王恪爲中衛將軍尚書令開府儀同三司中撫軍將軍世子方諸爲鄧州刺史左衛將軍王僧辯爲領軍將軍改封大款爲臨川郡王大成爲桂陽郡王大封爲汝南郡王是月任約進寇西陽武昌遣左衛將軍徐文盛右衛將軍陰子春太子右衛率蕭慧正舊州刺史席文獻等下武昌拒約以中衛將軍尚書令開府儀同三司南平王恪爲荊州刺史鎮武陵十一月甲子南平王恪侍中臨川王大款桂陽王大成散騎常侍江安侯圓正侍中左衛將軍張綰司徒左長史量等府州國一千人奉牋曰竊以嵩嶽既峻山川出雲大國有蕃

申甫惟翰豈非皇建斯極以位爲寶聖教辨方春名與器是知太尉佐帝重華表黃玉之符司空相土伯禹降元珪之錫伏惟明公大王殿下命世應期挺生將聖忠爲令德孝實天經地切應韓寄深且夷五品斯訓七政以齊志存社稷功濟屯險外寇內侵枕戈泣血鯨鯢未掃投袂勤王能使遊魂請盟以屈膝醜徒銜璧而誓氣親蕃外叛釁均吳楚義討申威兵不血刃湘波自息非築杜強之壘峴山離貳不伐劉表之城九江致梗二別殊派纔命戈船底定濶霍汜流窮討路絕窺窬寇兵侵界鐵馬霧合神規獨運皆即梟懸翻同翅折遂修職貢梁漢合契肆犀利之兵巴漢俱下竭驍勇之陣南通五嶺北出力原東裔不怨西戎卽序可謂上流千里持戟百萬天下之至貴四海之所推也今海水飛雲崑山起燭魏文悲樂推之歲韓宣歎成禮之日陽臺之下獨有冠蓋相趨夢水之傍尚致車輿結轍辦麥兩穗出于南平之邦甘露泥枝降乎當陽之境野鷺自續何謝歐絲閑田生稻寧殊雨粟莫非品物咸亨是稱文明光大豈可徵號不彰于彝典明試不陳乎車服者哉昔晉鄭人周尚作卿士蕭曹佐漢且居相國宜崇茲盛禮顯答羣望恪等稽尋甲令博詢悼史謹再拜上進位相國總百揆竹使符一別准恆儀杖金斧以剪逆暴乘玉輅而定社稷傍羅麗于日月貞明合于天地扶危翼治豈不休哉恪等不通大體自昧伏奏以聞世祖令答曰數鍾陽九時惟百六鯨鯢未翦寤寐痛心周粵天官秦稱相國東至於海西至於河南次朱爲北漸元塞率茲小宰弘斯大德將何用繼蹤曲阜擬跡桓文終

建一匡肅其五拜雖義屬隨時事無虛紀傳稱皆讓象著鳴謙瞻言前典再懷哽噎十二月壬辰以定州刺史蕭勃爲鎮南將軍廣州刺史遣護軍將軍尹悅巴州刺史王珣定州刺史杜多安帥衆下武昌助徐文盛大寶二年世祖猶稱太清五年二月己亥魏遣使來聘三月侯景悉兵西上會任約軍閏四月景午景遣其將朱子仙任約襲郢州執刺史蕭方諸戊申徐文盛陰子春等奔歸王珣尹悅杜多安並降賊庚戌領軍將軍王僧辯帥衆屯巴陵甲子景進寇巴陵五月癸未世祖遣遊擊將軍胡僧祐信州刺史陸法和帥衆下援巴陵任約敗景遂遁走以王僧辯爲征東將軍開府儀同三司尚書令胡僧祐爲領軍將軍陸法和爲護軍將軍仍令僧辯率衆軍追景所至皆捷八月甲辰僧辯下次湓城辛亥以鎮南將軍湘州刺史蕭方矩爲中衛將軍司空征南將軍南平王恪進號征南大將軍湘州刺史餘如故九月己亥以征東將軍開府儀同三司尚書令王僧辯爲江州刺史餘如故冬十月辛丑朔有紫雲如車蓋臨江陵城是月太宗崩侍中征東將軍開府儀同三司江州刺史尚書令長寧縣侯王僧辯奉表曰衆軍薄伐塗次九水卽日獲臨城縣使人報稱侯景弑逆皇帝賊害太子宗室在寇庭者並罹禍酷六軍慟哭三辰改曜哀我皇極四海崩心我大梁纂堯構緒基商啓祚太祖文皇帝徇齊作聖肇有六州高祖武皇帝聰明神武奄籠天下依日月而和四時履至尊而制六合麗正居貞大橫固社四葉相係三聖同基疊爾因渠遂憑天邑閭閻受白登之辱象魏致堯城之疑雲展承華

一朝俱酷金楨玉幹莫不同冤悠悠彼蒼何其罔極臣聞喪君有君春秋之茂典以德以長先王之通訓少康則收衆撫職祀夏所以配天平王則居正東遷宗周所以卜世漢光以能捕不道故景歷重昌中宗以不違羣議故江東可立儔今考古更無二謀伏惟陛下至孝通幽英武靈斷當七九之厄而應千載之期啓殷憂之明而居百王之會取威定霸嶮阻艱難建社治兵載循古道家國之事一至于斯天祚大梁必將有主軒輊得姓存者二人高祖五王代實居長乘屈先而陳諸侯拜子武而服大輅功齊九有道濟生民非奉聖明誰嗣下武臣聞日月貞明太陽不可以闕照天地貞觀乾道不可以久惕黃屋左纛本爲億兆而尊鸞輅龍章蓋以郊禋而貴寶器存乎至重介石慎于易差黔首豈可少選無君宗祚豈可一日無主伏願陛下掃地升中柴天改物事迫凶危運鍾擾攘蓋不勞宗正奉詔博士擇時南面卽可居尊西向無所讓德四方既知有奉八百始可同期殘寇潛居器藏社處乾象旣傾坤儀已覆斬莽輓車燒卓照市廓清函夏正爲犖陵開雪宮闈庶存鍾鼎彼黍離離伊何可言陛下繼明開祚卽宮舊楚左廟右社之制可以權宜五禮六樂之容歲時取備金芝九莖瓊茅三脊要衛率職尉候相里坐廟堂以朝四裔登靈臺而望雲物禪梁甫而封泰山臨東濱而禮日觀然後與三事大夫更謀都鄙左瀟右澗夾維可以爲居抗殿疏龍惟王可以在鎬何必勤勤建業也哉臣等不勝控款之至謹拜表以聞世祖奉諱大臨三日百官縞素乃答曰孤以不德天降之災枕戈飲膽扣心

泣血風樹之酷萬始不迫霜露之哀百憂總萃甫聞伯升之禍彌切仲謀之悲若封豕既殲長蛇即戮方欲追延陵之逸軌繼子臧之高讓豈資秋亭之壇安事繁陽之石侯景項籍也蕭棟殷辛也赤泉未賞劉邦尚曰漢王白旗弗懸周發猶稱太子飛龍之位孰謂可躋附鳳之徒既聞來議辟公卿士其論孤之志無忽司空南平王恪率宗室五千餘人領軍將軍胡僧祐率羣僚二百餘人江州別駕張俠率吏民三百餘人並奉牋勸進世祖固讓十一月乙亥王僧辯又奉表曰紫宸曠位赤縣無主百靈變動萬國同皇雖醉醒相扶同歸景毫式歌且誦總赴唐郊僧懼陛下俛首潛然讓德不嗣傳車在這方慎宋昌之謀法駕已陳尚杜耿純之勸岳牧翹首天民累息臣聞星回日薄擊雷鞭電者之謂天岳立川流吐霧蒸雲者之謂地苞天地之混成洞陰陽之不測而以裁成萬物者其在聖人乎故云天地之大德曰生聖人之大寶曰位黃屋廟堂之下本非獲已而居明鏡四衢之緯蓋由應物取馴伏惟陛下稽古文思英雄特達比以周旦則文王之千方之放動則帝堯之季千年旦暮可不在此斯庭闕渾亡鍾鼎淪覆嗣膺景歷非陛下而誰豈可使赤眉更立盆子隗囂託置高廟陛下方復從容高讓用執謙光展其矯行偽書誣罔正朔見機而作斷可識矣匪疑何上無待著龜日者公卿失取禍繼膏極侯景憑陵奸臣互起率戎伐類無處不然勸明誅晉側足皆爾刁斗夜鳴烽火相照中朝人士相顧銜悲涼州義徒東望殞涕僕黔首將欲安歸陛下英略緯天沈明內斷橫劍泣血枕戈膏膺農山

圯下之策金匱玉鼎之謀莫不定算展帷決勝千里擊靈樞之鼓而建翠華之旗驅六州之兵而總九伯之伐四方雖虞一戰以霸斬其鯨鯢既章大戮荷校滅耳莫匪奸回史不絕書府無虛月自洞庭安波彭蠡底定文昭武穆芳若椒蘭敵國降城和如親戚九服同謀百道俱進國恥家怨計期就雪社稷不墜繫在聖明今也何時而申帝啓之避凶危若此方陳泰伯之辭國有具臣誰敢奉詔天下者高祖之天下陛下者萬國之歡心萬國豈可無君高祖豈可廢祀即日五星夜聚八風通吹雲烟紛紛日月光華百官象物而動軍政不戒而備飛艦巨艦竟水浮川鐵馬銀鞍陵山跨谷英傑接踵忠勇相顧湛宗族以酬恩焚妻子以報主莫不覆楯衛威提斧擊衆風飛電耀志滅凶醜所待陛下昭告后土虔奉上帝廣發明詔師出以名五行夕返六軍曉進便當盡司寇之威窮蚩尤之伐執石趙而求重斬姚秦而取鍾脩掃坐陵奉迎宗廟陛下豈得不仰存國計俯從民請漢宣嗣位之後即遣蒲類之軍光武登極既竟始有長安之捷由此言之不無前准臣等或世受朝恩或身荷重遇同休等戚自國刑家苟有腹心敢以死奪不任懷懷之至謹重奉表以聞世祖答曰省示復具一二孤聞天生蒸民而樹之以君所以對揚天休司牧黔首攝提合維以前栗陸驪連之外書契不傳無得稱也自阮泉彰其武功丹陵表其文德有人民焉有社稷焉或歌謠所歸或惟天所相孤遭家多難大恥未雪國賊則蚩尤弗窮同姓則有扈不實臥而思之坐以待旦何以應實曆何以嗣龍圖庶一戎既定罪人斯得

祀夏配天方申來儀也是時巨寇尚存未欲卽位而四方表勸前後相屬乃下令曰大壯乘乾明夷垂翼璿度亟移玉律屢徙四岳頻遣勸進九轉比者表聞譙沛未復瑩陵永遠于居干處瘡痍懷何心何顏撫茲歸運自今表奏所由並斷若有啓疏可寫此令施行是日賊司空東南道大行臺劉神茂率儀同劉歸義雷異赴義奉表請降大寶三年世祖猶稱太清六年正月甲戌世祖下令曰軍國多虞戎旅未靜青領雖熾黔首宜安時惟星鳥表年祥于東秩春紀宿龍歌歲取于南峻况三農務業尚看天桃敷水四人

叛臣鳴鏑餘懸弧空城本非國寶壽春鐵要實不踰月開海陵之倉賑常平之米概九府之費錫三宮之錢冒干貨賄不知紀極敢與逆亂使我王畿賊臣正德阻兵安忍日者結怨江卒遠適單于簡牘屢彰彭生之魂未弭聚斂無度景卿之諫已及爲虎傅翼遠相招致度劉我生民離散我兄弟我是以董率臯貌躬擐甲冒霜戈照日則晨離奪輝龍騎蔽野則平原掩色信與江水同流氣與寒風俱憤凶醜畏威委命下吏乞活淮肥苟存徐充渙汗既行絲綸爰被我是以班師凱歸休牛息馬賊猶不悛遂復矢流王屋兵躡象魏總章之觀非復聽訟之堂甘泉之宮永乖避暑之地坐召憲司臥制朝宰矯託天命僞作符書重增賦斂肆意哀剝生者逃竄死者暴尸道路以目庶僚鉗口刑戮失衷爵賞由心老弱波流士女塗炭臧獲之人五宗及賞縉紳之士三族見誅粟騰踴自相吞噬懷慄黔首路有銜索之哀蠶蠶黎民家有隕山之泣僇師南望無復儲胥露寒河陽北臨或有穹廬甍帳南山之竹未足言其愆西山之兔不足書其罪外監陳瑩之至伏承先帝登遐宮車晏駕奉諱驚號五內摧裂州窀本毒無地容身景阻飢飢甚民且俱顧遂侵軼我彭蠡憑陵我郡邑竊據我江夏掩襲我巴丘我是以義勇爭先忠貞盡力斬賊兇渠不可稱算沙同赤岸水若絳河任約泥首于安南化仁面縛于漢口子仙乞活于鄧郢希榮敗績于柴桑侯景奔竄十風爭穴郭默清夷晉熙附義計窮力屈反殺後主畢原鄧郁竝離禍患凡將邪茅皆伏鉄鎖是可忍也孰不可容莫府據有上流實惟分陝決袂荷

戈志在畢命昔周依晉鄭漢有虛半彼惟末屬猶能如此况聯華日月天下不賤爲臣爲子兼國兼家者哉咸以義旗旣建宜須總一共推莫府實用主盟粵以不佞謬董連率遠惟國艱不遑寧處中權後勁翼行天罰提戈蒙險阻越以之天馬千群長戟百萬驅貴獲之士資智勇之力大楚踰荆山淺源度彭蠡舳艫汎水以倚其南輜輶委輸以衝其北華夷百濮羸糧影從雷震風駭直指建業按劍而叱江水爲之倒流抽戈而揮皎日爲之退舍方駕長驅百道俱入夷山珍谷充原蔽野挾輶曳牛之侶拔距礮石之夫騎則逐日追風弓則吟猿猿落鴈捧鳬崑崙而壓朔傾渤海而灌樊如駟馬之載鴻毛若奔牛之觸魯縞以此衆戰誰能禦之脫復蜂蟻若毒獸窮則鬪謂山蓋高則四郊多壘謂地蓋遠則三千弗遑如彼怒蛙譬諸駭鼠豈費萬鈞無勞百溢加以日臨黃道兵起絳宮三門既啓五將咸發舉整整之旗掃亭亭之氣故以臨機密運非賊所解奉義而誅何罪不服今遣使持節大都督征東將軍開府儀同三司江州刺史尚書令長寧縣開國侯王僧辯率衆十萬直掃金陵鳴鼓聒天掘金振地朱旗夕建如赤城之霞起戈船夜動若滄海之奔流計其同惡不盈一旅君子在野小人比周荷校滅耳匪朝伊夕春長秋之喉繫邦支之頸今司寇明罰鎖鉢所誅止侯景而已黎元何辜一無所問諸君或世樹忠貞身荷寵爵羽儀鼎族勳王府俛眉捐駑無由自效豈不下慙泉壤上愧皇天失忠與義難以自立想誠南風迺瞻西顧因變立功轉禍爲福有能縛侯景及送首者封萬戶開國公絹布五

萬匹有能率動義衆以應官軍保全城邑不爲賊用上賞方伯下賞剖符竝裂山河以紆青紫昔由余入秦禮同卿佐日輝降漢且珥金貂必有其才何卹無位若執迷不反拒逆王師大軍一臨臨茲罔救孟諸焚燎芝艾俱盡宣房河決玉石同沈沈賞之科有如皎日黜陟之制事均白水檄布遠近咸使知聞三月王僧辯等平侯景傳其首于江陵戊子以賊平告明堂大社己丑王僧辯等又奉表曰衆軍以今月戊子總集建康賊景鳥伏獸窮頻擊頻挫奸竭詐盡深溝自固臣等分勦武旅百道同趣突騎短兵犀函鐵楯結隊千羣持戟百萬止紂七步圍項三重轟然大潰羣凶四滅京師少長俱稱萬歲長安酒食于此價高九縣雲開六合清明矧伊黔首誰不載躍伏惟陛下咀痛茹哀嬰憤忍酷自紫庭降闕烟塵四起孺垣好時冀馬雲屯泣血治兵嘗瞻誓衆而吳楚一家方與七國俱反管蔡流言又以三監作亂西涼義衆阻強秦而不通并州遺民跨飛狐而見泯豺狼當路非止一人鯨鯢不梟倭焉五載英武克振怨恥竝雪永尋霜露如何可言臣等輒依故實奉脩社廟使者持節分告塋陵嗣后升遐龍輅不殯承華掩耀梓宮莫測竝即隨由備辦禮具凶荒四海同哀六軍袒哭聖情孝友理當感慟日者百司岳牧祈仰宸鑒以錫珪之功既歸有道當璧之禮允屬聖明而優詔謙冲宵然擬遯飛龍可躋而乾爻在四帝閭云叫而閭闔未開謳歌再馳是用翹首所以越人固執黑丹穴以求君周民樂推踰岐山而事主漢王不卽位無以貴功臣光武不止戈豈謂紹宗廟黃帝遊於襄城尚訪治民

之道放勳入於姑射猶使縛組有歸伊此儻來豈聖人所欲帝王所應不獲已而然伏讀聖書尋諷制旨顧懷物外未奉慈衷陛下日角龍顏之姿表於徇齊之日彤雲素氣之瑞基於應物之初博覽則大哉無所與名深言則賾乎昭章之觀忠爲令德孝實動天加以英威茂略雄圖武算指麾則丹浦不戰顧盼則阪泉自蕩地維絕而重紐天柱傾而更植鑿河津於孟門百川復啓補穹儀以五石萬物再生縱陛下拂袵衣而遊廣成登揜山而去東土羣臣安得仰訴兆庶何所歸仁况郊祀配天疊篚禮贐齋宮清廟匏竹不陳仰望鑒與匪朝伊夕瞻言法駕載渴且飢豈可久稽衆議有曠彝則舊郊既復函維已平高奴樸陽宮館雖毀濁河清渭佳氣猶存阜門有仇甘泉四畝土圭測景仙人承露斯蓋九州之赤縣六合之樞機博士捧圖書而稍還太常定禮儀而已列豈得不揚清駕而赴名都具玉鑾而遊正寢昔東周既遷鎬京遂其不復長安一亂郊洛未以爲居夏后以萬國朝諸侯文王以六州匡天下跡基百里劍杖三尺以殘楚之地抗拒九攻一旅之師翦滅三叛坦然大定御輦東歸解五牛于冀州秣六馬于譙郡緬求前古其可得歟對揚天命何所讓德有理存焉敢重所奏相國答曰省表復具一二羣公卿士億兆夷人咸以皇天聽命歸運所屬用集寶位于予一人文叔金吾之官事均往顧孟德征西之位且符前說今淮海長鯨雖云授首襄陽短狐未全革面太平玉燭爾乃議之辛卯宣猛將軍朱賈臣密害豫章嗣王棟及其二弟橋樛世祖志也四月乙巳益州刺史新除假黃鉞太

尉武陵王紀竊位于蜀改號天正元年世祖遣兼司空蕭太祠部尚書樂子雲拜謁陞陵脩復社廟丁巳世祖今日軍容不入國國容不入軍雖子產獻捷戎服從事亞夫勿拜義止將兵今凶醜殲夷逆徒殄潰九有既截四海又安漢官威儀方陳盛禮衛多君子寄是式瞻便可解嚴以時宣勅是月以東陽太守張彪爲安東將軍五月庚午司空南平王恪及宗室王侯大都督王僧辯等復拜表上尊號世祖猶固讓不受庚辰以征南將軍湘州刺史司空南平王恪爲鎮東將軍揚州刺史餘如故甲申以尚書令征東將軍開府儀同三司江州刺史王僧辯爲司徒鎮衛將軍乙酉斬賊左僕射王偉尚書呂季略少卿周石珍舍人嚴璽於江陵市是日世祖令曰君子赦過者在周經聖人解網聞之湯令自檢狃孔熾長蛇薦食赤縣貼危黔黎塗炭終宵不寐志在雪恥元惡稽誅本屬侯景王偉是其心膂周石珍背負恩義今竝烹諸鼎獲肆之市朝但比屯寇擾爲歲已積衣冠舊責被逼偷生猛士動豪和光苟免凡諸惡侶諒非一族今特闢以王澤削以刑書自太清六年五月二十日昧爽以前咸使惟新是月魏遣太師潘洛辛等寇秦郡王僧辯遣杜顗帥衆拒之以陳霸先爲征北大將軍開府儀同三司南徐州刺史是月魏遣使賀平侯景八月蕭紀率巴蜀大衆連舟東下遣護軍陸法和屯巴峽以拒之兼通直散騎常侍聘魏使徐陵于鄴奉表曰臣聞封唐有聖還承帝嚳之家居代惟賢終纂高皇之祚無爲稱干草革至治表于垂衣而撥亂反正非間前古至如金行重作源出東莞炎運猶昌

枝分南頓豈得掩顯姓于軒輶非才子于顓頊莫不時因多難俱繼神宗者也伏惟陛下出震等于勳華明讓同於日夷握圖執鉞將在御天玉璽珠衡先彰元后神祇所命非惟太室之祥圖畫歸何止堯門之瑞若夫大孝聖人之心中庸君子之德固以作訓生民貽風多士一日二日研覽萬幾允文允武包羅羣藝擬茲三大實是四門歷試諸難咸熙庶績斯無得而稱也自無妄與暴皇祚浸微封豨修蛇行災中國靈心所宅下武其興望紫極而長號瞻丹陵而殞慟家冤將報天賜黃鳥之旗國害宜誅神奉元狐之籙滕公擁樹雄氣方嚴張繡交兵風神彌勇忠誠貫於日月孝義感於冰霜如寔如雷如虎如龍驅効命元惡斯殲既挂膽于西州方燃膽于東市蚩尤三冢寧謂嚴誅王莽千剗非云明罰邦畿濟濟還見隆平宗廟愔愔方承多福自氣氤氳沌沌之世驪連栗陸之君封起龍圖文因鳥跡雲師火帝非無戰陣之風堯誓湯征咸用干戈之道星躔東井時破嶺雷震南陽初平尋邑未有援三靈之已墜救四海之群飛赫赫明明冀行天罰如當今之盛者也於是卿雲似蓋晨映姚姬甘露如珠朝華景寢芝房感德咸出銅池冀英伺辰無勞銀箭重以東漸元兔西踰白狼高柳生風扶桑盛日莫不編名屬國歸質鴻臚服來賓遐邇同福其文昭武穆跼蹐也如彼天平地成功業也如此久應旁求掌固諮詢天官斟酌繁昌經營高邑宋王啓霸非勞陽武之侯清蹕無虞何事長安之邸正應揚鑾旂以饗帝仰鳳展以承天歷數在躬疇與爲讓去月二十日兼散騎常侍柳暉等至鄴伏

承聖旨謙冲爲而勿宰或云涇陽未復函谷無泥旋駕金陵方膺天眷愚謂大庭少昊非有定居漢祖殷宗皆無恆宅登封岱岳猶置明堂巡狩章陵時行司隸何必西瞻虎據乃建王宮南望牛頭方稱天闕抑又聞之元圭既錫蒼玉無陳乃械櫜之愆期非苞茅之不貢雲和之瑟久廢甘泉孤竹之管無聞方澤豈不懼歎伏願陛下因百姓之心拯萬邦之命豈可逡巡固讓方求石戶之農高謝君臨徒引箕山之客未知上德之不德惟見聖人之不仁率土翹翹蒼生何望昔蘇李張儀違鄉負俗尚復招三方以事趙請六國以尊秦況臣等顯奉皇華親承朝命珪璋特達通聘河陽貂珥雍容亭盟漳水加牢貶館隨勢汗隆瞻望鄉關誠均休戚但輕生不造命與時乖忝一介之行人同三危之遠擯承間內殿事絕耿弇之恩封奏邊城私等劉琨之哭不勝區區之至謹拜表以聞九月甲戌司空鎮東將軍揚州刺史南平王恪薨冬十月乙未前梁州刺史蕭循自魏至于江陵以循爲平北將軍開府儀同三司戊申執湘州刺史王琳于殿內琳副將殷晏下獄死辛酉以子方略爲湘州刺史庚戌林州長史陸納及其將潘烏景等舉兵反襲陷湘州是月四方征鎮王公卿士復勸世祖卽尊號猶諫讓未許表三上乃從之承聖元年冬十一月丙子世祖卽皇帝位于江陵詔曰夫樹之以君司牧黔首帝堯之心豈貴黃屋誠弗獲已而臨莅之朕皇祖太祖文皇帝積德岐梁化行江漢道映在田具瞻斯屬皇考高祖武皇帝明並日月功格區宇應天從民惟睿作聖太宗簡文皇帝地侔啓謫方符文景外寇憑

陵時難孔棘朕大拯橫流克復宗社羣公卿士百辟庶僚咸以皇靈瞻命歸運斯及天命不可以久淹宸極不可以久曠粵若前載憲章令範畏天之威算隆寶曆用集神器于予一人昔虞夏商周年無嘉號漢魏晉宋因循以久朕雖云撥亂且非創業思得上繫宗祧下惠億兆可改太清六年爲承聖元年通租宿責並許弘貸孝子義孫可悉賜爵長徒錄士特加原宥禁錮羣勞一皆曠蕩是日世祖不升正殿公卿陪列而已按王僧辯傳僧辯爲湘東王國左常侍遷竟陵太守號雄信將軍屬侯景反王命僧辯假節總督舟師一萬兼糧饋赴援纔至京都宮城陷沒天子蒙塵僧辯與柳仲禮兄弟及趙伯超等先屈膝于景然後入朝景悉收其軍實而厚加綏撫未幾遣僧辯歸于竟陵于是倍道兼行西就世祖世祖承制以僧辯爲領軍將軍及荆湘疑貳軍師失律世祖又命僧辯及鮑泉統軍討之分給兵糧旬日就道時僧辯以竟陵部下猶未盡來意欲待集然後上頓謂鮑泉曰我與君俱受命南討而軍容若此計將安之泉曰既稟廟算驅率驍勇事等沃雪何所多慮僧辯曰不然君之所言故是文士之常談耳河東少有武幹兵刃又彊新破軍師養銳待敵自非精兵一萬不足以制之我竟陵甲士數經行陣已遺召之不久當及雖期日有限猶可重申欲與卿共入言之望相佐也泉曰成敗之舉繫此一行遲速之宜終當仰聽世祖性嚴忌微聞其言以爲遷延不肯去稍已含怒及僧辯將入謂泉曰我先發言君可見係泉又許之及見世祖世祖迎問曰卿已辦乎何日當發僧辯具對如向所

言世祖大怒按劍厲聲曰卿憚行邪因起入內泉震怖失色竟不敢言須臾遣左右數十人收僧辯既至謂曰卿拒命不行是欲同賊今唯有死耳僧辯對曰僧辯食祿既深憂責實重今日就戮豈敢懷恨但恨不見老母世祖因斫之中其左髀流血至地僧辯問絕久之方蘇卽送付廷尉并收其子姪並皆繫之會岳陽王軍襲江陵人情騷擾未知其備世祖遣左右往獄問計于僧辯僧辯具陳方略登卽敕爲城內都督俄而岳陽奔退而鮑泉力不能尅長沙世祖乃命僧辯代之數泉以十罪遣舍人羅重歡領齋仗三百人與僧辯俱發既至遣通泉云羅舍人被令送王竟陵來泉甚愕然顧左右曰得王竟陵助我經略賊不足平俄而重歡齋令書先入僧辯從齋仗繼進泉方拂席坐而待之僧辯既入背泉而坐曰鮑郎卿有罪今旨使我錄卿勿以故意見待因語重歡出令泉卽下地錄于牀側僧辯仍部分將帥并力攻圍遂平湘土還復領軍將軍侯景浮江西寇軍次夏首僧辯爲大都督率巴州刺史淳于量定州刺史杜龢宜州刺史王琳郴州刺史裴之橫等俱赴西陽軍次巴陵開郢州已沒僧辯因據巴陵城世祖乃命羅州刺史徐嗣徽武州刺史杜勣並會僧辯于巴陵景既陷郢城兵衆益廣徙黨甚銳將進寇荊州乃使僞儀同丁和統兵五千守江夏大將宋子仙前驅一萬造巴陵景悉因徒水步繼進于是綠江皮邏望風請服賊拓還至于隱磯僧辯悉上江渚米糧並沈公私船於水及賊前鋒大江口僧辯乃分命衆軍乘城固守偃旗臥鼓安若無人翌日賊衆濟江輕騎至城下問城內是

誰答曰是王領軍賊曰語王領軍事勢如此何不早降僧辯使人答曰大軍但向荊州此城自當非擬僧辯百口在人掌握豈得便降賊騎既去俄爾又來曰我王已至王領軍何爲不出與王相見邪僧辯不答頃之又執王珣等至於城下珣爲書誘說城內景帥船艦並集北寺又分入港中登岸治道廣設氈屋耀軍城東隴上芟除草莽開八道向城遣五千兔頭肉薄苦攻城內同時鼓譟矢石雨下殺賊既多賊乃引退世祖又命平北將軍胡僧祐率兵下援僧辯是日賊復攻巴陵水步十處鳴鼓吹脣肉薄斫上城上放木擲火礮礮石殺傷甚多午後賊退乃更起長柵繞城大列舸艦以樓船攻水城西南角又遣人渡洲岸引梓柯推蝦蟆車填壘引障車臨城二日方止賊又於艦上豎木桔槔聚茅置火以燒水柵風勢不利自焚而退既頻戰挫賊帥任約又爲陸法和所擒景乃燒營夜遁旋軍夏首世祖策勳行賞以僧辯爲征東將軍開府儀同三司江州刺史封長寧縣公於是世祖命僧辯即率巴陵諸軍沿流討景師次郢城步攻魯山魯山城主支化仁景之騎將也率其黨力戰衆軍大破之化仁乃降僧辯仍督諸軍渡江攻郢即入羅城宋子仙蟻聚金城拒守攻之未剋子仙使其黨時靈護率衆三千開門出戰僧辯又大破之生擒靈護斬首千級子仙衆退據倉門帶江阻險衆軍攻之頻戰不剋景既聞魯山已沒郢鎮復失羅城乃率餘衆倍道歸建業子仙等困蹙計無所之乞輸郢城身還就景僧辯偶許之命給船百艘以老其意子仙謂爲信然浮舟將發僧辯命杜龕率精勇千人攀堞

而上同時鼓譟掩至倉門水軍主朱遙率樓船暗江四面雲合子仙行戰行走至于白楊浦乃大破之生擒子仙送江陵即率諸軍進師九水賊僞儀同范希榮盧暉略尚據淦城及僧辯軍至希榮等因挾江州刺史臨城公棄城奔走世祖加僧辯侍中尚書令征東大將軍給鼓吹一部仍令僧辯且頓江州須衆軍齊集得時更進頃之世祖命江州衆軍悉同大舉僧辯乃表皇帝凶問告於江陵仍率大將百餘人連名勸世祖即位將欲進軍又重奉表雖未見從並蒙優答僧辯於是發自江州直指建業乃先命南兖州刺史侯瑱率銳卒輕舸襲南陵鵠頭等戍至即剋之先是陳霸先率衆五萬出自南江前軍五千行至淦口霸先個儻多謀策名蓋僧辯僧辯畏之既至淦口與僧辯會于白茅洲登壇盟誓霸先爲其文曰賊臣侯景逆天無狀構造姦惡違背我恩義破掠我國家毒害我生民移毀我社廟我高祖武帝靈聖聰明光宅天下劬勞北庶亭育萬民如我考妣五十所載哀景以窮見歸全景將戮之首置景要害之地崇景非次之榮我高祖於景何薄我百姓於景何怨而景長載疆弩陵蹙朝廷鋸牙卸旬殘食含靈剋肝斷趾不厭其快曝骨焚屍不謂爲酷高祖非食卑官春秋九十屈志凝威憤憤終賊手大行皇帝溫嚴恭默不守鴻名於景何有復加忍毒皇枝繼抱已上總功以還窮刀極俎既屠且醢豈有率土之濱謂爲王臣食人之禾飲人之水忍聞此痛而不悼心况臣僧辯臣霸先等荷稱國藩湘東王臣繹泣血銜哀之寄摩頂至足之恩世受先朝之德身當將帥之任而不能瀝膽抽

腸共誅姦逆雪天地之痛報君父之仇則不可以稟靈含識戴天履地今日相國至孝元感靈武斯發已破賊徒復其元帥止餘景身尚在京邑臣僧辯與臣霸先協和將帥同心共契必誅凶豎尊奉相國嗣膺鴻業以主郊祭前途若有一功獲一賞臣僧辯等不推己讓物先身帥衆則天地宗廟百神之靈共誅共責臣僧辯臣霸先同心共事不相欺負若有違戾明神殛之於是升壇歃血共讀盟文皆淚下霑襟辭色慷慨及王師次于南洲賊帥侯子鑒等率步騎萬餘人于岸挑戰又以鵠舸千艘並載土兩邊悉八十棹棹手皆越人去來趣襲捷過風電僧辯乃麾細船皆令退縮悉使大艦夾泊兩岸賊謂水軍欲退爭出趨之衆軍乃棹大艦截其歸路鼓譟大呼合戰中江賊悉赴水僧辯即督諸軍沿流而下進軍於石頭之斗城作連營以逼賊賊乃橫嶺上築五城拒守侯景自出與王師大戰于石頭城北霸先謂僧辯曰醜逆遊魂貫盈已稔逋誅迭死欲爲一決我衆賊寡宜分其勢即遣疆弩二千張攻賊西面兩城仍使結陣以當賊僧辯在後麾軍而進復大破之盧暉略聞景戰敗以石頭城降僧辯引軍入據之景之退也北走朱方於是景散兵走告僧辯僧辯令衆將入據臺城其夜軍人採柘失火燒太極殿及東西堂等時軍人擄掠京邑剝剔士庶民爲其執縛者袒衣不免盡驅逼居民以求購贖自石頭至于東城緣淮號呼之聲震響京邑于是百姓失望僧辯命侯瑱裴之橫率精甲五千東入討景僧辯收賊黨王偉等二十餘人送於江陵僞行臺趙伯超自吳松江降於侯瑱瑱時送至僧

辯僧辯謂伯超曰趙公卿荷國重恩遂復同逆今日之事將欲何如因命送江陵伯超既出僧辯顧坐客曰朝廷昔惟知有趙伯超耳豈識王僧辯社稷既傾爲我所復人之典廢亦復何常賓客皆前稱嘆功德僧辯瞿然乃謬答曰此乃聖上之威德羣帥之用命老夫雖濫居戎首何力之有焉於是逆寇悉平京都尅定世祖卽帝位以僧辯功進授鎮衛將軍司徒加班劍二十人改封永寧郡公食邑五千戶侍中尚書令鼓吹並如故

元帝承聖三年九月丙午敬帝以皇太子卽皇帝位按梁書敬帝本紀敬皇帝諱方智字慧相小字法真世祖第九子也太清三年封興侯承聖元年封晉安王邑二千戶二年出爲平南將軍江州刺史三年十一月江陵陷太尉揚州刺史王僧辯司空南徐州刺史陳霸先定議以帝爲太宰承制奉迎還京師四年二月癸丑至自尋陽入居朝堂以太尉王僧辯爲中書監錄尚書驃騎將軍都督中外諸軍事加司空陳霸先班劍三十人以豫州刺史侯瑱爲江州刺史儀同三司湘州刺史蕭循爲太尉儀同三司廣州刺史蕭勃爲司徒鎮東將軍張彪爲郢州刺史三月齊遣其上黨王高渙送貞陽侯蕭淵明來主梁嗣至東關遣吳興太守裴之橫與戰敗績之橫死太尉王僧辯率衆出屯姑孰四月司徒陸法和以郢州附于齊遣江州刺史侯瑱討之七月辛丑王僧辯納貞陽侯蕭淵明自采石濟江甲辰入於京師以帝爲皇太子九月甲辰司空陳霸先舉義襲殺王僧辯黜蕭淵明景午帝卽皇帝位紹泰元年冬十月己巳詔曰王室

不造嬰罹禍孽西都失守朝廷淪覆先帝梓宮播越非所王基傾弛率土罔戴朕以荒幼仍屬艱難泣血枕戈志復讎逆大恥未雪夙宵鯁憤羣公卿尹勉以大義越登寡闇嗣奉洪業顧惟夙心念不至此庶仰憑元靈傍資將相克清元惡謝免陵寢今陞命載新宗祏更祀慶流億兆豈予一人可改承聖四年爲紹泰元年大赦天下內外文武賜位一等以貞陽侯淵明爲司徒封建安郡公食邑三千戶壬子以司空陳霸先爲尚書令都督中外諸軍事車騎將軍揚南徐二州刺史司空如故按王僧辯傳僧辯進驃騎大將軍中書監都督中外諸軍事錄尚書與陳霸先參謀討伐時齊主高洋又欲納貞陽侯淵明以爲梁嗣因與僧辯書曰梁國不造禍難相仍侯景傾蕩建業武陵彎弓巴漢卿志格元穹精貫白日戮力齊心芟夷逆醜凡在有情莫不嗟尚况我鄰國緝事言前而西寇乘間復相掩襲梁主不能固守江陵殞身宗祏王師未及便已降敗士民小大皆畢于寇乃瞻南顧憤歎盈懷卿臣子之情念當鯁裂如聞權立枝子號令江陵年卅十餘極爲冲藐梁璽未已負荷諒難祭則衛君政由甯氏幹弱枝強終古所忌朕以天下爲家大道濟物以梁國淪滅有懷舊好存亡拯墜義在今辰扶危嗣事非長伊德彼貞陽侯梁武猶子長沙之裔以年以望堪保金陵故置爲梁主納于彼國便詔上黨王渙總攝羣將扶送江表雷動風馳助掃寇逆清河王岳前救荆城軍度安陸既不相及憤惋良深恐及西寇乘流復躡江左今轉次漢口與陸居士相會卿宜協我長規厲彼羣帥部分舟楫迎接今王

鳩勒勁勇并心一力西羌烏合本非劫寇直是湘東怯弱致此淪胥今者之師何往不尅善建良圖副朕所望也貞陽承齊遺送將屆壽陽貞陽前後頻與僧辯書論還國繼統之意僧辯不納及貞陽高渙至於東關散騎常侍裴之橫率衆拒戰敗績僧辯因遂謀納貞陽仍定君臣之禮啓曰自泰兵寇朕臣便營赴援纔及下船荆城陷沒卽遭劉周入國具表丹誠左右勳蒙初並同契周既多時不還人情疑阻比聞降中使復遣諸處詢謀物論參差未甚決定始得侯瑛信示西寇權景宣書令以眞跡上呈觀視將帥恣欲同泰若一朝仰違大國臣不辭灰粉悲染祚未絕中興伏願陛下便事齊江仰藉皇齊之威恩陛下至聖之略樹君以長雪報可期社稷再輝死且非委請抑別使曹冲馳表齊都續啓事以聞伏遲拜奉在促貞陽答曰姜高至枉示具公忠義之懷家國喪亂於今積年三后蒙塵四海騰沸天命元輔匡救本朝弘濟艱難建武宗祏至於丘園板築尚想來儀公室皇枝豈不慮遲聞孤還國理會高懷但近再命行人或不宣具公既詢謀卿士訪逮藩維沿沂往來理淹旬月使乎屈止殊副所期便是再立我蕭宗重興我梁國億兆黎庶咸蒙此恩社稷宗祏曾不相愧近軍次東關頻遣信裴之橫處示其可否答對驕凶殊駭聞矚上黨王陳兵見衛欲敘安危無識之徒忽然逆戰前旌未舉卽自披猖驚悼之情彌以傷惻上黨王深自矜嗟不傳首級更蒙封樹節棺厚殯務使優禮齊朝大德信感神明方仰藉皇威敬憑元宰討逆賊於咸陽誅叛子於雲夢同心叶力克定邦家覽所示權景

宣書上流諸將本有忠略棄親向讎庶當不爾防奸
定亂終在於公今且頓東關更待來信未知水陸何
處見迎夫建國立君布在方策入盟出質有自來矣
若公之忠節上感蒼旻羣帥同謀必匪攜貳則齊師
反旆義不陵江如致爽言誓以無克輶旗側席遲復
行人曹冲奉表齊都即押送也渭橋之下惟遲敘言
汜水之陽預有號懼僧辯又重啓曰員外常侍姜嵩
還奉敕伏具動止大齊仁義之風曲被鄰國郵災救
難申此大猷皇家枝戚莫不榮荷江東冠冕俱知憑
賴今敵不忘信信實由衷謹遣臣第七息顯顯所生
劉井弟子世珍往彼充質仍遣左民尚書周弘正至
歷陽奉迎爐舳浮江俟一龍之渡清宮丹陛候六傳
之入萬國傾心同榮晉文之反三善克宣方流宋昌
之議國祚既隆社稷有奉則羣臣竭節報厚施於大
齊戮力展愚效忠誠於陛下今遣吏部尚書王通奉
啓以聞僧辯因求以敬帝爲皇太子貞陽又答曰王
尚書通至復枉示知欲遣賢弟世珍以表誠實具悉
憂國之懷復以庭中玉樹掌內明珠無累冒懷志在
匡救豈非劬勞我社稷弘濟我邦家慙歎之懷用忘
與寢晉安王東京貽厥之重西都繼體之賢嗣守皇
家寧非民望但世道喪亂宜立長君以其蒙孽難可
承業成昭之德自古希儔冲質之危何代無此孤身
當否運志不圖生忽荷不世之恩仍致非常之舉自
惟虛薄兢懼已深若建承華本歸皇胃心口相誓惟
擬晉安如或虛言神明所殛覽今所示深遂本懷戢
慰之情無寄言象但公憂勞之重既稟齊恩忠義之
情復及梁貳華更兆庶豈不懷風宗廟明靈豈不相

感正爾迴旆仍向歷陽所期質累便望來彼衆軍不
渡已著盟書斯則大齊聖主之恩規上黨英主之然
諾得原失信終不爲也惟遲相見使在不賒鄰國非
遙觸目號咽僧辯使送質於鄣員陽求渡衛士三千
僧辯慮其爲變止受散卒千人而已并遣龍舟法駕
往迎貞陽濟江之日僧辯擁楫中流不敢就岸後乃
同會於江寧浦貞陽既踐僞位仍授僧辯大司馬領
太子太傅揚州牧餘悉如故陳霸先時爲司空南徐
州刺史惡其讎覆與諸將議因自京口舉兵十萬水
陸俱至襲於建康於是水軍到僧辯常處於石頭城
是日正視事軍人已踰城北而入南門又馳白有兵
來僧辯與其子顗遽走出閣左右心腹尚數十人衆
軍悉至僧辯計無所出乃據南門樓乞命拜請霸先
因命縱火焚之方其顗下就執霸先曰我有何辜公
欲與齊師賜討又曰何意全無防備僧辯曰委公北
門何謂無備爾夜斬之

按陳書高祖本紀承聖三年進高祖位司空十一月
西魏攻陷江陵高祖與王僧辯等進啓江州請晉安
王以太宰承制又遣長史謝哲奉牋勸進十二月晉
安王至自尋陽入居朝堂給高祖班劍二十人四年
五月齊送貞陽侯淵明還主社稷王僧辯納之即位
改元曰天成以晉安王爲皇太子初齊之請納貞陽
也高祖以爲不可遣使詣僧辯苦爭之往返數四僧
辯竟不從高祖居常憤歎密謂所親曰武皇雖磐石
之宗遠布四海至於尅雪讎恥寧濟艱難唯孝元而
已功業茂盛前代未聞我與王公俱受重寄語未絕
音聲猶在耳豈期一旦便有異圖嗣主高祖之孫元

皇之子海內屬目天下宅心竟有何辜坐致廢黜還
求外國假立非次觀其此情亦可知矣乃密具袍數
千領及錦綵金銀以爲賞賜之具九月壬寅高祖召
徐度侯安都周文育等謀之仍部列將士分賞金帛
水陸俱進是夜發南徐州討王僧辯甲辰高祖步軍
至石頭前遣勇士自城北踰入時僧辯方視事外白
有兵俄而兵自內出僧辯遽走與其第三子顗相遇
俱出閣左右尚數十人苦戰高祖大兵尋至僧辯衆
寡不敵走登城南門樓高祖因風縱火僧辯窮迫乃
就擒是夜縊僧辯及顗丙午貞陽侯遜位百僚奉晉
安王上表勸進十月乙酉晉安王即位改承聖四年
爲紹泰元年

欽定古今圖書集成明倫彙編皇極典

第一百八十六卷目錄

登極部彙考十二

陳武帝永定二則 文帝天康一則 宣帝太建二則

皇極典第一百八十六卷

登極部彙考十二

陳

武帝永定元年冬十月乙亥以陳王受梁禪即皇帝位

按陳書武帝本紀高祖武皇帝諱霸先字興國小字法生吳興長城下若里人漢太丘長陳寔之後也世居潁川寔元孫華晉太尉準生匡匡生達永嘉南遷爲丞相掾歷太子洗馬出爲長城令悅其山水遂家焉嘗謂所親曰此地山川秀麗當有王者興二百年後我子孫必鍾斯運達生康復爲丞相掾咸和中土斷故爲長城人康生盱眙太守英英生尚書郎公弼公弼生步兵校尉鼎鼎生散騎侍郎高生懷安令詠詠生安成太守猛猛生太常卿道巨道巨生皇考文讀高祖以梁天監二年癸未歲生少儻有大志不治生產既長讀書多武藝明達果斷爲當時所推服身長七尺五寸日角龍顏垂手過膝嘗游義興館於許氏夜夢天開數丈有四人朱衣捧日而至令

高祖開口納焉及覺腹中猶熱高祖心獨負之大同初新喻侯蕭瑒爲吳興太守甚重高祖嘗目高祖謂僚佐曰此人方將遠大及瑒爲廣州刺史高祖爲中直兵參軍隨府之鎮瑒令高祖招集士馬衆至千人仍命高祖監宋隆郡所部安化二縣元不賓高祖討平之尋監西江督護高要郡守先是武林侯蕭諮爲交州刺史以哀刻失衆心土人李賁連結數州豪傑同時反臺遣高州刺史孫罔新州刺史盧子雄將兵擊之罔等不時進皆於廣州伏誅子雄弟子略與罔子姪及其主帥杜天合杜僧明共舉兵執南江督護沈瑒進寇廣州晝夜苦攻州中震恐高祖率精兵三千卷甲兼行以救之頻戰屢捷天合中流失矢賊衆大潰僧明遂降梁武帝深歎異焉授直閣將軍封新安子邑三百戶仍遣書工圖高祖容貌而觀之其年冬蕭瑒卒明年高祖送喪還都至大庾嶺會有詔高祖爲交州司馬領武平太守與刺史楊驥南討高祖益招勇敢器械精利驥喜曰能尅賊者必陳司武也委以經略高祖與衆軍發自番禺是時蕭勃爲定州刺史於西江相會勃知軍士憚遠役陰購誘之因詭說驥驥集諸將問計高祖對曰交趾叛渙罪由宗室遂使僭亂數州彌歷年稔定州復欲昧利目前不顧大計節下奉辭伐罪故當生死以之豈可畏憚宗室輕於國憲今若奪人沮衆何必交州討賊問罪之師即回有所指矣於是勒兵鼓行而進十一年六月軍至交州貴衆數萬於蘇歷江口立城柵以拒官軍驥推高祖爲前鋒所向摧陷貴走典徵湖於屈獬界立峇大造船艦充塞湖中衆軍憚之頓湖口不敢進高

祖謂諸將曰我師已老將士疲勞歷歲相持恐非良計且孤軍無援入人心腹若一戰不捷豈望生至今藉其屢奔人情未固裔獬烏合易爲摧殄正當共出百死決力取之無故停留時事去矣諸將皆默然莫有應者是夜江水暴起七丈注湖中奔流迅激高祖勒所部兵乘流先進衆軍鼓譟俱前賊衆大潰賁竄入屈獬洞中屈獬斬賁傳首京師是歲太清元年也賁兄天寶遁入九真與劫帥李紹隆收餘兵二萬殺德州刺史陳文戒進圍愛州高祖仍率衆討平之除振遠將軍西江督護高要太守督七郡諸軍事二年冬侯景寇京師高祖將率兵赴援廣州刺史元景仲陰有異志將圖高祖高祖知其計與成州刺史王懷明行臺選郎殷外臣等密議戒嚴三年七月集義兵於南海馳檄以討景仲景仲窮蹙益於閣下高祖迎蕭勃鎮廣州是時臨賀內史歐陽頔監衡州蘭裕蘭京禮扇誘始興等十郡共舉兵攻頔頔請援於勃勃令高祖率衆救之悉擒裕等仍監始興郡十一月高祖遣杜僧明胡穎將二千人頓於嶺上并厚結始興豪傑同謀義舉侯安都張偁等率千餘人來附蕭勃聞之遣鍾休悅說高祖曰侯景驍勇天下無敵前者援軍十萬士馬精強然而其敗當鋒遂令寇賊得志君以區區之衆將何所之如聞嶺北王侯又皆鼎沸河東桂陽相次屠戮邵陵開建親尋干戈李遷仕許身當陽便奪馬仗以君疎外詎可暗投未若且往始興遙張聲勢保此太山自求多福高祖泣謂休悅曰僕庸虛蒙國成造往聞侯景渡江即欲赴援遭值元蘭梗我中道今京師覆沒主上蒙塵君辱臣死誰

敢愛命君侯體則皇枝任重方岳不能摧鋒萬里雪此冤痛見遣一軍猶賢乎已乃降後自使人慨然僕行計決矣憑爲披述乃遣使問道往江陵稟承軍期節度時蔡路養起兵據南康勃遺腹心譚世遠爲曲江令與路養相結同退義軍大寶元年正月高祖發自始興次大庾嶺路養出軍頓南野依山木立四城以拒高祖高祖與戰大破之路養脫身竄走高祖進頓南康湘東王承制授高祖員外散騎常侍持節明威將軍交州刺史改封南野縣伯六月高祖修崎頭古城徙居焉高州刺史李遷仕據大旱遣主帥杜平鹵率千人入贛石魚梁高祖命周文育將兵擊走之遷仕奔寧都承制授高祖通直散騎常侍持節信威將軍豫州刺史領豫章內史改封長城縣侯尋授散騎常侍使持節都督六郡諸軍事軍師將軍南江州刺史餘如故時寧都人劉蕡等資遷仕舟艦兵仗將襲南康高祖遣杜僧明等率二萬人據白口築城以禦之遷仕亦立城以相對二年三月僧明等攻拔其城生擒遷仕送南康高祖斬之承制命高祖進兵定江州仍授江州刺史餘如故六月高祖發自南康南康嶺石舊有二十四灘離多巨石行旅者以爲難高祖之發也水暴起數丈三百里間巨石皆沒進軍頓西昌有龍見於水濱高五丈許五采鮮耀軍民觀者數萬人時承制遣征東將軍王僧辯督衆軍討侯景八月僧辯軍次湓城高祖率杜僧明等衆軍及南川豪帥合三萬人將會焉時西軍之食高祖先貯軍糧五十萬石至是分三十萬以資之仍頓巴丘會侯景廢簡文帝立豫章嗣王棟高祖遣兼長史沈哀

奉表於江陵勸進十一月承制授高祖使持節都督會稽東陽新安臨海永嘉五郡諸軍事平東將軍東揚州刺史領會稽太守豫章內史餘並如故三年正月高祖率甲士三萬人強弩五千張舟艦二千東發自豫章二月次桑落洲遣中記室參軍江元禮以事表江陵承制加高祖鼓吹一部是時僧辯已發湓城會高祖於白茅灣乃登岸結壇刑牲盟約進軍大蕪湖侯景城主張黑棄城走三月高祖與諸軍進寇姑孰仍次蔡洲侯景登石頭城觀軍形勢意甚不悅謂左右曰此軍上有紫氣不易可當乃以舳舻貯石沈塞淮口緣淮作城自石頭迄青溪十餘里中樓雉相接諸將未有所決僧辯遣杜朗問計於高祖高祖曰前柳仲禮數十萬兵隔水而坐草聚之在青溪竟不渡岸賊乃登高望之表裏俱盡肆其凶虐覆我王師今圖石頭須渡北岸諸將若不能當鋒請先往立柵高祖即於石頭城西橫隴築柵衆軍次連八城直出東北賊恐西州路斷亦於東北果林作五城以遏大路景率衆萬餘人鐵騎八百餘匹結陣而進高祖曰軍志有之善用兵者如常山之蛇首尾相應今我師旣衆賊徒甚寡應分賊兵勢以弱制強何故聚其鋒銳令必死於我乃命諸將分處置兵賊直衝王僧志僧志小縮高祖遣徐度領弩手二千橫截其後賊乃卻高祖與王琳杜龕等以鐵騎悉力乘之賊退據其柵景儀同盧瑋略開石頭北門來降盪王戴冕曹宣等攻拔果林一城衆軍又克其四城賊復還殊死戰又盡奪所得城柵高祖大怒親率攻之士卒騰柵而入賊復散走景與百餘騎棄稍執刀左右衝陣陣不

動景衆大潰遂北至西明門景至闕下不敢入臺遣腹心取其二子而遁高祖率衆出廣陵應接會景將郭元建奔齊高祖納其部曲二千人而還僧辯啓高祖鎮京口五月齊遣辛術圍嚴超達於秦郡高祖命徐度領兵助其固守齊衆七萬填壘起土山穿地道攻之甚急高祖乃自率萬人解其圍縱兵四面擊齊軍弓弩亂發齊平秦王中流矢死斬首數百級齊人收兵而退高祖振旅南歸遣記室參軍劉本仁獻捷於江陵七月廣陵僑民朱盛張象潛結兵襲齊刺史溫仲邕遣使來告高祖率衆濟江以應之會齊人來聘求割廣陵之地王僧辯許焉仍報高祖高祖於是引軍還南徐州江北人隨軍而南者萬餘口承制授高祖使持節散騎常侍都督南徐州諸軍事征北大將軍開府儀同三司南徐州刺史餘並如故及王僧辯率衆征陸納於湘州承制命高祖代鎮揚州十一月湘東王即位於江陵改大寶三年爲承聖元年湘州平高祖旋鎮京口三年三月進高祖位司空餘如故十一月西魏攻陷江陵高祖與王僧辯等進啓江州請晉安王以太宰承制又遣長史謝哲奉牒勸進十二月晉安王至自尋陽入居朝堂給高祖班劍二十人四年五月齊送貞陽侯淵明還主社稷王僧辯納之即位改元曰天成以晉安王爲皇太子初齊之請納貞陽也高祖以爲不可遣使詣僧辯苦爭之往返數四僧辯竟不從高祖居常憤歎密謂所親曰武皇雖磐石之宗遠布四海至於寇雠寧濟艱難唯孝元而已功業茂盛前代未聞我與王公俱受重寄語未絕音聲猶在耳豈期一旦便有異圖嗣主高

祖之孫元皇之子海內屬目天下宅心竟有何辜坐致廢黜遠求敵國假立非次觀其此情亦可知矣乃密具袍數千領及錦綵金銀以爲賞賜之具九月壬寅高祖召徐度侯安都周文育等謀之仍部列將士分賞金帛水陸俱進是夜發南徐州討王僧辯甲辰高祖步軍至石頭前遣勇士自城北踰入時僧辯方視事外自有兵俄而兵自內出僧辯遽走與其第三子領相遇俱出閣左右尚數十人苦戰高祖大兵尋至僧辯衆寡不敵走登城南門樓高祖因風縱火僧辯窮迫乃就擒是夜綏僧辯及領景午貞陽侯遜位百僚奉晉安王上表勸進十月己酉晉安王卽位改承聖四年爲紹泰元年壬子詔授高祖侍中大都督中外諸軍事車騎將軍揚南徐二州刺史持節司空班劍鼓吹並如故仍詔高祖甲仗百人出入殿省震州刺史杜龕據吳興與義興太守韋載同舉兵反高祖命周文育率衆攻載於義興龕遣其從弟北叟將兵拒戰北叟敗歸義興辛未高祖表自東討雷高州刺史侯安都石州刺史杜稜宿衛臺省甲戌軍至義興景子拔其水柵泰州刺史徐嗣徽據其城以入齊又要南豫州刺史任約共舉兵應龕載齊人資其兵食嗣徽等以京師空虛率精兵五千奄至闕下侯安都領驍勇五百人出戰嗣徽等退據石頭丁丑載及北叟來降高祖撫而釋之以嗣徽寇逼卷甲還都命周文育進討杜龕十一月己卯齊遣兵五千濟渡據姑孰高祖命台州刺史徐度於冶城寺立柵南抵淮渚齊又遣安州刺史翟子崇楚州刺史劉仕榮淮州刺史柳達摩領兵萬人於胡墅渡米粟三萬石馬千

匹入於石頭癸未高祖遣侯安都領水軍夜襲胡墅燒齊船千餘艘周鐵虎率舟師斷齊運輸擒其北徐州刺史張領州獲運舫米數千石仍遣韋載於大航築城使杜稜據守齊人又於倉門水南立二柵以拒官軍甲辰嗣徽等攻冶城柵高祖領鐵騎精甲出自西門門襲擊之賊衆大潰嗣徽雷柳達摩等守城自率親屬腹心往南州采石以迎齊援十二月癸丑高祖遣侯安都領舟師襲嗣徽家口於秦州俘獲數百人官軍連艦塞淮口斷賊水路先是太白自十一月景戌不見乙卯出於東方景辰高祖盡命衆軍分部甲卒對冶城立航渡兵攻其水南二柵柳達摩等渡淮置陣高祖督兵疾戰縱火燒柵煙塵漲天賊潰爭舟相排擠溺死者以千數時百姓夾淮觀戰呼聲震天地軍士乘勝無不一當百盡收其船艦賊軍懾氣是日嗣徽約等領齊兵水步萬餘人還據石頭高祖遣兵往江寧據要險以斷賊路賊水步不敢進頓江寧浦口高祖遣侯安都領水軍襲破之嗣徽等乘單舸脫走盡收其軍資器械己未官軍四面攻城自辰訖酉得其東北小城及夜兵不解庚申達摩遣使侯子欽劉仕榮等詣高祖請和高祖許之乃於城門外刑牲盟約其將士部曲一無所問恣其南北辛酉高祖出石頭南門陳兵數萬送齊人歸北者壬戌齊和州長史烏九遠自南州奔還歷陽江寧令陳嗣黃門侍郎曹則據姑孰反高祖命侯安都徐度等討平之斬首數千級聚爲京觀石頭采石南州悉平收獲馬仗船米不可勝計是月杜龕以城降二年正月癸未誅杜龕於吳興龕從弟北叟司馬沈孝敦並賜死二

月庚申高祖遣侯安都周鐵虎率舸艦備江州仍頓梁山起柵甲子敕司空有軍旅之事可騎馬出入城內戊辰前寧遠石城公外兵參軍王位於石頭沙際獲玉璽四紐高祖表以送臺三月戊戌齊遣水軍儀同蕭軌庫狄伏連襲難宗東方老侍中裴英起東廣州刺史獨孤辟惡洛州刺史李希光并任約徐嗣徽等率衆十萬出柵口向梁山帳內盪主黃叢逆擊敗之燒其前軍船艦齊頓軍保蕪湖高祖遣定州刺史沈泰吳郡太守裴忌就侯安都共據梁山以禦之自去冬至是甘露頻降於鍾山梅岡南潤及京口江寧縣境或至三數升大如奕基于高祖表以獻臺四月丁巳高祖詣梁山軍巡撫五月甲申齊兵發自蕪湖景申至秣陵故治高祖遣周文育屯方山徐度頓馬牧杜稜頓大航南己亥高祖率宗室王侯及朝臣將帥於大司馬門外白虎闕下刑牲告天以齊人背約發言慷慨涕泗交流同盟皆莫能仰視士卒觀者益奮辛丑齊軍於秣陵故縣路淮立橋柵引渡兵馬其夜至方山侯安都周文育徐度等各引還京師癸卯齊兵自方山進及兒塘游騎至臺周文育侯安都頓白土岡旗鼓相望都邑震駭高祖潛撤精卒三千配沈泰渡江襲齊行臺趙彥琛於瓜步獲舟艦百餘艘陳粟萬斛卽日子總羽林禁兵頓於長樂寺六月甲辰齊兵潛至鍾山龍尾丁未進至莫府山高祖遣錢明領水軍出江乘要擊齊人糧運盡獲其船米齊軍於是大餒殺馬驢而食之庚戌齊軍踰鍾山高祖衆軍分頓樂遊苑東及覆舟山北斷其衝要壬子齊軍至元武湖西北莫府山南將據北郊壇衆軍自覆

舟東移頓郊壇北與齊人相對其夜大雨震電暴風
拔木平地水丈餘齊軍晝夜坐立泥中懸隔以囊而
臺中及潮溝北水退路燥官軍每得番易甲寅少霽
高祖命衆軍秣馬摩食進明攻之乙卯旦自率帳內
麾下出莫府山南吳明徹沈泰等衆軍首尾齊舉縱
兵大戰侯安都自白下引兵橫出其後齊師大潰斬
獲數千人相蹂藉而死者不可勝計生執徐嗣徽及
其弟嗣宗斬之以徇追奔至於臨沂其江乘攝山鍾
山等諸軍相次克捷擄蕭軌東方老王敬寶李希光
裴英起等將帥凡四十六人其軍士得寶至江者縛
荻筏以濟中江而溺流屍至京口潞水彌岸丁巳衆
軍出南州燒賊舟艦已未斬劉歸義徐嗣彥傳野猪
于建康市是日解嚴庚申蕭軌東方老王敬寶李希
光裴英起皆伏誅高祖表解南徐州以授侯安都七
月景子詔授高祖中書監司徒揚州刺史進爵爲公
增邑并前五千戶侍中使持節都督中外諸軍事將
軍尚書令班劍鼓吹甲仗並如故并給油幢早輪車
是月侯瑱以江州入附遣侯安都鎮上流定南中諸
郡八月癸卯太府卿何敬新州刺史華志各上玉璽
一高祖表以送臺詔歸之高祖是日詔高祖食安吉
武康二縣合五千戶九月壬寅改年曰太平元年進
高祖位丞相錄尚書事鎮衛大將軍改刺史爲牧進
封義興郡公侍中司徒都督班劍鼓吹甲仗早輪車
並如故丁未中散大夫王彭賤稱今月五日平旦於
御路見龍跡自大社至象闕互三四里庚申詔追贈
高祖考侍中光祿大夫加金章紫綬封義興郡公諡
曰恭十月甲戌敕丞相自今入問訊可施別榻以近

展坐二年正月壬寅天子朝萬國於太極東堂加高
祖班劍十人并前二十人餘如故丁未詔贈高祖兄
道談散騎常侍使持節節北將軍南兗州刺史長城
縣公諡曰昭烈弟休光侍中使持節驃騎將軍南徐
州刺史武康縣侯諡曰忠壯食邑各二千戶甲寅遣
兼侍中謁者僕射陸繹策拜長城縣夫人章氏爲義
興國夫人丁卯詔贈高祖侍中太常卿諡曰孝追
封高祖祖母許氏吳郡嘉興縣君諡曰敬妣張氏義
興國太夫人諡曰宣二月庚午蕭勃舉兵自廣州度
嶺頓南康遣其將歐陽頔傳泰及其子孜爲前軍至
於豫章分屯要險南江州刺史徐孝頃起兵應勃高
祖命周文育侯安都率衆討平之八月甲午進高祖
位太傅加黃鉞劍履上殿入朝不趨贊拜不名并給
羽葆鼓吹一部其侍中都督錄尚書鎮衛大將軍揚
州牧義興郡公班劍甲仗油幢早輪車並如故景申
加高祖前後部羽葆鼓吹是時湘州刺史王琳擁兵
不應命高祖遣周文育侯安都率衆討之九月辛丑
詔曰肇昔元胎剖判太素氤氲崇建人皇必憑洪宰
故賢哲之后牧伯征於四方神武之君大監治乎萬
國又有一匡九合渠門之賜以隆義帶圍溫行宮之
寵斯茂時危所以貞固運泰所以光熙斯乃千載同
風百王不刊之道也太傅義興公允文允武乃聖乃
神固天生德康濟黔首昔在休期早降朝寄遠踰滄
海大拯交越星運不造書契未聞中國其亡兵凶總
至哀哀噍類譬彼窮牢悠悠上天莫云斯極否終則
泰元輔應期救此將崩援茲已溺乘舟履輦架險浮
深經略中途畢殲羣醜泊乎石頭姑孰流髓履腸一

朝指爲六合清晏是用光昭下武翼亮中都雪三后
之勃讎夷三靈之巨慝堯台禹佐未始能階股相周
師固非云擬重之以屯剗餘家荆楚大崩天地無心
乘輿委御五胡薦食競謀諸夏八方基時莫有匡救
強臣放命黜我冲人顧影於荼毒之魂甘心於審卿
之辱却按下游求哀之路莫從竊鉄逃責容身之地
無所公神兵奄至不日清澄惟是屏蒙再膺天錄斯
又巍巍蕩蕩無得而稱焉加以仗茲忠義屠彼妖逆
震部夷氣稽山罷殷番禹蠡澤北鄙西郊殲厥凶徒
罄無遺種斯則兆民之命修短所縣率土之基興亡
是賴於是刑禮兼訓治革有章中外咸平遐邇寧一
用能使陽光合魄曜象呈輝樓閣遊庭抱仁含信宏
勳該於厚地大道格於元天義農炎昊以來卷領垂
衣之世聖人濟物未有如斯者也夫備物典策桓文
是膺助理陰陽蕭曹不讓未有功高於萬縣而實薄
於伊周凡厥人祗因懷延佇實由公謙撝自牧降損
爲懷嘉數遲回永言增歎豈可申茲雅尚久廢朝餼
宜戒司勳敬升鴻典且重華大聖媽炳惟賢盛德之
祀無忘公侯之門必復是以殷嘉賈甫繼后稷之官
堯命羲和纂重黎之位况其本枝攸建宜晉山河者
乎其進公位相國總百揆封十郡爲陳公備九錫之
禮加璽綬遠遊冠緣綬綬位在諸侯王上其鎮衛大
將軍揚州牧如故策曰大哉乾元資日月以貞觀至
故坤元憑山川以載物故惟天爲大降配者欽明惟
王建國翼輔者齊聖是以文武之佐礪礪其玉瑣
堯舜之臣榮河鍊其金版况乎體得一之鴻安寧陽
九之危厄拯橫流於碣石撲燎火於崑岑驅駁於韋

彭跨蹠於齊晉神功行而靡用聖道運而無名者乎
今將授公典策其敬聽朕命日者昊天不弔鍾虢於
我國家網漏吞舟強敵內熒茫茫宇宙惴惴黎元方
足圓顛萬不遺一太清否亢橋山之痛已深大寶屯
如平陽之禍相繼上宰膺運康救兆民鞠旅於滇池
之南揚旌於桂嶺之北懸三光於已墜謚四海於羣
飛屠猋竄於中原斷鯨鯢於濠汜蕩寧上國光啓中
興此則公之大造於皇家者也既而天未悔禍外患
薦臻南夏崩騰西京蕩覆羣兇孔熾藉亂乘間推納
藩枝盜假神器冢司昏提旁引寇讎既見貶於桐宮
方謀危於漢閣皇運已殆何殊贅旒中國搖然非徒
如綏公赫然投袂匡救本朝復宮齊都平戎王室朕
所以還膺寶曆重履宸居挹建武之風猷詞宣王之
雅頌此又公之再造於皇家者也公應務之初登庸
惟始三川五嶺莫不窺臨銀洞珠宮所在寧謐孫盧
肇孽越狎爲災番部陷危勢將淪殄公赤旗所指祇
壘洞開白羽纔搗兇徒粉潰非其神武久喪南藩此
又公之功也大同之末邊政不修李賁狂迷竊我交
愛敢稱大號驕恣甚於尉陀據有連州雄豪熾於梁
碩公英募雄算電掃風行馳御樓船直跨滄海新昌
典澈備履艱難蘇歷嘉寧盡爲京觀三山徐洞八角
蠻貊逃矣水寓之鄉悠哉火山之國馬援之所不屆
陶璜之所未開莫不懼我王靈爭朝邊候歸隊天府
獻狀鴻臚此又公之功也自寇逆陵江宮闈幽辱公
枕戈嘗膽提劍撫心氣涌霄神飛紫閣而番禺連
率本自諸裔言得其朋是懷同惡公仗此忠誠乘機
剿定執沛令而豐鼓平新野而據鞍此又公之功也

世道初艱方隅多難動門桀黠作亂衡疑兵切池隍
衆兼蠻獠公以國盜邊警知無不爲卹是同盟誅其
醜類莫不魚驚鳥散面縛頭懸南士黔黎重保蘇息
此又公之功也長驅嶺嶠夢想京畿綠道會豪遞爲
榛梗路養渠率全據大都蓄聚逋逃方謀亂亂百樓
不戰雲梯之所未窺萬弩齊張高棚之所非敵公龍
驤虎步嘯吒風雲山靡堅城野無強陣清祇氛於瀛
石滅冷氣於事都此又公之功也遷仕兇愚屯據大
皐乞活類馬騰之軍流民多杜殘之衆推鋒闢關自
北徂南頻歲稽誅實惟勅寇公坐揮三略遙制六奇
義勇同心貌狎驍力雷奔電擊谷靜山空列郡無犬
吠之驚叢祠罷狐鳴之盜此又公之功也王師討寇
次屆淪波兵之兼儲士有饒色公回麾蠡澤積穀巴
丘億庚之誅斯豐壺漿之迎是衆軍民轉漕曾無砥
柱之難鹽軸相望如運故倉之府庫渠貝胃顧蔑雷
霆高懸層樓仰捫霄漢故使三軍勇銳百戰無前承
此兵糧遂殄凶逆此又公之功也若夫英圖邁俗義
旅如雲溢壘猜攜用淹戎略公志唯同獎師克在和
鵠塞非虞鴻門是會若晉侯之誓白水如蕭王之推
赤心屈禮交盟人祇感咽故能使舟師並路遠邇朋
心此又公之功也姑執轡要嶺阻懣寇寇據其關
梁大盜負其扁鵲公一校裁搗三雄並奮左賢右角
沙潰土崩木甲殫於中原氍毹赴於江水他藉藉
萬計千羣鄂坂之隘斯開夷庚之道無塞此又公之
功也義軍大衆俱集帝京逆豎因徒猶屯皇邑若夫
表裏山河金湯險固疏龍首以抗殿擗華嶽以爲城
維寇憑焉強兵自若公同茲地軸抗此天羅曾不崇

朝俾無遺噓軍容甚穆國政方修物重親於衣冠民
還瞻於禮樂楚人滿道爭覩於葉公漢老銜悲俱歎
於司隸此又公之功也內難初靜諸侯出關外郡傳
烽鮮卑犯塞莫非且渠當戶中貴名王翼馬迴於淮
南胡笳動於徐北公舟師步甲互野橫江殲厥羣醜
遂殲封豨莫不結木而止戎車靡遺遇澤而旋歸殄
盡殄此又公之功也公克黜禍難劬勞室而孫寧
之黨翻啓秋心伊洛之間咸爲敵戍雖金陵佳氣石
壘天嚴朝闇戎塵夜喧胡鼓公三籌既畫八陣斯張
裁舉靈鉅亦抽金僕咸俘醜類悉反高墉異李廣之
皆誅同龐元之盡赦此又公之功也任約叛漢梟聲
不悅戎寇貪婪復心無改公左甄右落箕張翼舒掃
是梟槍驅其獫狁長狄之種埋於國門椎髻之酋烹
於軍市投秦坑而盡沸噎澁水而不流此又公之功
也一相居中自折彝鼎五湖小守妄懷同惡公夙駕
兼道秉羽杖戈玉斧將揮金鉞且戒祇會震懾遠請
灰釘燕觀以表其含弘焚書以安其反側此又公之
功也賊龜兇橫陵虐具區阻兵安忍悲怙亂自古
蟲言鳥跡渾沌洪荒凡或度創未此殘酷公雖宗居
汝穎世寓東南育聖誕賢之鄉含章挺生之地眷言
桑梓公私憤切卓爾英狀承規奉筭戮此大慈如烹
小鮮此又公之功也亂離未久羣盜孔多浙左凶渠
連兵構逆豈止干兵五校白雀黃龍而已哉公以中
軍元率選自親賢奸寇途窮濯然冰泮刑唐之所文
命動其大威雷門之間句踐行其嚴戮規聖跡異
代同風此又公之功也同姓有扈頑兇不賓憑藉宗
盟圖危社稷觀兵匯澤勢震京師驅率南蠻已爲東

帝公論兵於廟堂之上決勝於綰組之間寇賈樊滕浮江下瀨一朝擒撲無待旬師萬里澄清非勞新息此又公之功也豫章祇寇伏憑山澤緒甲完聚名歷歲時結從連橫爰泊交廣呂嘉既獲吳濠已縱命我還師征其不恪連營盡拔偽黨斯擒曜聖武於匡山回神旌於蠡派此又公之功也自八紘九野瓜剖豆分竊帝倫王連州比縣公武靈已暢文德又宣折簡馳書風猷斯遠至於蒼蒼浴日杳杳無雷北泊丈夫之鄉南踰女子之國莫不屈膝膜拜求吏款關此又公之功也京師禍亂亟積寒暄雙關低昂九門寥豁寧泰宮之可顧豈魯殿之猶存宋微子麥稊之歌周大夫黍離之歎方之於斯未足為悲公求衣昧且晨食高春與構官闈具瞻遐邇郊庠宗稷之典六符十等之章還聞太始之風流重親末平之遺事此又公之功也公有濟天下之動重之以明德凝神體道合德符天用百姓以爲心隨萬機而成務恥一物非唐虞之民歸含靈於仁壽之域上德不德無爲以爲夏長春生顯仁藏用忠信爲寶風雨弗憊仁惠爲基牛部分益明於是衆心乃定泰知柵內人少日夜苦攻世祖激厲將士身當矢石相持數旬泰乃退走及高祖遣周文育率兵討龔世祖與并軍往吳興時龔兵尚衆斷據衝要水步連陣相結世祖命將軍劉澄將元舉率衆攻龔龔軍大敗窘急因請降東揚州刺史張彪起兵圍臨海太守王懷振懷振遣使求救世祖與周文育輕兵往會稽以掩彪後彪將沈泰開門納世祖世祖盡收其部曲家累彪至又被走若邪村民斬彪傳其首以功授持節都督會稽等十郡諸軍事

宣毅將軍會稽太守山越深險皆不實附世祖分命討擊悉平之威惠大振高祖受禪立爲臨川郡王邑二千戶拜侍中安東將軍及周文育侯安都敗于沌口高祖詔世祖入衛軍儲戎備皆以委焉尋命率兵城南皖永定三年六月丙午高祖崩遺詔徵世祖入纂甲寅至自南皖入居中書省皇后令曰昊天不弔上元降禍大行皇帝奄捐萬國率土哀號普天如喪窮酷煩冤無所追及諸孤藐爾反國無期須立長主以寧寓縣侍中安東將軍臨川王禧體自景皇屬惟三鉉任總百司位絕朝班禮由事革其以相國總百揆除錄尚書之號上所假節侍中貂蟬中書監印章中外都督太傅印綬義興公印策其鎮衛大將軍揚州牧如故又加公九錫其敬聽後命以公禮爲楨幹律等銜策四維皆舉八柄有章是用錫公大輅戎輅各一元牡二駟以公賤實崇毅疏爵待農室富京坻民知榮辱是用錫公袞冕之服赤舄副焉以公調理陰陽變諸風雅三靈允降萬國同和是用錫公軒縣之樂六佾之舞以公宣導王猷弘闡風教光景所照觀象必通是用錫公朱戶以居以公抑揚清濁褒德進賢髦士盈朝幽人虛谷是用錫公納陛以登以公巖然廊廟爲世範範折衝四表臨御八荒是用錫公虎賁之士三百人以公執茲明罰期在刑措象恭無赦千紀必誅是用錫公斧鉞各一以公英猷遠量跨厲嵩溟包一車書括囊寰宇是用錫公彤弓一彤矢百旅弓十旅矢千以公天經地義貫徹幽明春露秋霜允恭柔盛是用錫公鉅鬯一卣主瓊副焉陳國置丞相已下一遵舊式往欽哉其恭循朕命克相皇天

弘建邦家允興洪業以光我高祖之休命十月戊辰進高祖爵爲王以揚州之會稽臨海永嘉建安南徐州之晉陵信義江州之潯陽豫章安成廬陵并前爲二十郡益封陳國其相國揚州牧鎮衛大將軍並如故又命陳王冕十有二旒建天子旌旗出警入蹕乘金根車駕六馬備五時副車置旄頭雲罕樂舞八佾設鍾簾宮縣王妃王子王女爵命之號陳臺百官一依舊典辛未梁帝禪位于陳詔曰五運更始三正迭代司牧黎庶是屬聖賢用能經緯乾坤彌綸區宇大庇黔首闡揚鴻烈革晦以明積代同軌百王踵武咸由此則梁德渟微禍亂薦發太清云始見困長蛇承聖之季又羅封豕爰至天成重竊神器三光亟沈七廟之祀合生已泯鼎命斯墜我武元之祚有如綴旒靜惟屯剝夕惕載懷相國陳王有命自天降神惟嶽天地合德辱曜齊明拯社稷之橫流提億兆之塗炭東誅逆叛北殲獯醜威加四海仁漸萬國復張崩樂重興絕禮儒館聿修戎亭虛侯大功在舜盛德惟禹巍巍蕩蕩無得而稱來獻白瓊豈皇皇虞之世入貢素雉非止隆周之日固以效珍川陸表瑞煙雲甘露醴泉旦夕凝涌嘉禾朱草華植郊甸道昭於悠代勳格於皇穹明明上天光華日月革故著於元象代德彰於圖讖獄訟有歸詭譎愛適天之歷數實有攸在朕雖庸藐聞于古昔未稽崇替爲已久敢忘列代之遺典人祇之至願乎今便遜位別宮敬禪於陳一依唐虞宋齊故事策曰咨爾陳王惟昔上古厥初生民驪連栗陸之前咨成大庭之代並結繩爲鳥杳冥恍忽故靡得而詳焉自義農軒昊之君陶唐有虞之